

Man hat aber das Golt schmeidig zu machen mit einerley / sondern viel weg darzu gebraucht / Allein dasz einer viel leichter vnd besser als der andere gewesen: Ich wil aber etliche weiß vñ wege setzen / der ich eines theils versucht hab / darausz ein jeder seiner gelegenheit nach / bericht nemen mag / welcher ihm zu brauchen am füglichsten seyn wil.

So du Golt hast das vngeschmeidig ist / es seyn Vngerisch Cronen / Vngerisch Cronen oder Reinish Golt. oder Reinish Golt / vñd wilt das geschmeidig machen / so thu ihm also: Geusz das vngeschmeidig Golt erstlich zu ein Zain / setz den in ein Tiegel in einen Bindofen / oder für das Gebläß / vñd gib im ein starcks Feuer / vñd habe acht darauff / wann sich das Golt schweisset / vñd bald fließen wil / so wirff guten geleuterten Salpeter darauff / so wirt das Golt vom Salpeter brennen / vñd vollent bald fließen / So bald nun das Golt mit dem Salpeter fleust / so wirt der Salpeter das Golt gar bedecken / Salpeter. dann mustus nicht hart treiben / damit du das Golt vnter dem Salpeter nicht blicken siehest / sondern geusz es darunter herausz in einen Zingusz / der mit Wachs geschmirt ist / so ist es geschmeidig. Etliche brauchen vnter den Salpeter vngelöschten Kalch / das thuts auch / vñd wirt das Vngelöschten Kalch. Golt schmeidig darvon.

Wo es aber versehen würd / dasz das Golt im eynsetzen in Tiegel flösz / ehe dann der Salpeter im schweissen darauff geworffen were / so geusz es wider herausz in einen Zain / vñd setze es wider eyn / dann es wirt sonst nicht geschmeidig / ob du gleich viel Salpeter darauff wirffest. Wer aber das Golt (als im Reinishen Golt wol geschicht) so gar vnschmeidig / dasz es in einem mal nicht gar schmeidig worden wer / so setz es zum andern mal eyn / so wirt es geschmeidig / vñd ob gleich Messing darunter wer.

Du solst auch wissen wann das Golt mit dem Salpeter so hart getrieben wirt / dasz es blicket / vñd vor dem Salpeter wol kan gesehen werden / so wirt es auch nicht geschmeidig / dann die Vngeschmeidigkeit treibt sich auß dem Salpeter wider in das Golt / Derhalben gut achtung darauff zu geben / dasz der Salpeter zu rechter zeit darauff geworffen / vñd das Golt auch zu rechter zeit wider herausz gegossen werde / so hastu geschmeidig Golt.

— 85 —



2 ij

Solget